



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

44. Kalenderwoche – ab 01. Oktober 2010

Dor Ball is rund

Isch bin ja Fußballfenn - mid Leib un Seehle! Weil ehm Fußball ooch unheimlich wundorsam is! Ja, wundorsam! Was bei Fußball alles bassiern dud... kleene Voreine wern bledzlich Meesdor... Bayorn Minschn schdeischd ab... - guhd, ganz soweit isses noch nisch, abor es dud immor widdor Wundor gähm! Un was dähn Fußball werglisch dodahl von anre Schbordardn unnorscheidn dud, das is, weil bei Fußball nisch alles so is, wies offn erschn Bligg erschein dud. Fußball had immor noch een dobbldn Bodn. Bei Fußball dud eene Ard Philesophie dahinnor schdeggn!

Zum Beischbiel - dor Ball is ehm nisch eenfach e Ball, nee, bei Fußball is dor Ball rund! Un das is nu nisch bloß so gemeend, dass dähr Ball von dor Form hähr rund is, nee, das meend, dass dor Ball ooch vom Inhald hähr rund is - unbereschnbar... wundorsam!

Mor kennde ja werglisch manschma denkn, dass dor Ball so hubbn dud wieor hubbd, weil e Frosch drinne is, abor da is kee Frosch, das is de eischne Seehle vom Ball! Keenor weeiß genau, wennor dageeschn ladschd, wo dähr Ball hinhubbn dud. Odor hinflieschn dud - je nachdähm! So manschor Schuß, dähr offs Dohr gehn sollde, dud im Nirschendwo landn - im Nirwahnha! Un das dud ja dann schon an Buddhismus grenzn!

Das eischendliche Ziel beim Fußball isses ja dann, dähn Ball ins geeschnorische Dohr neinzubugsiern! Egahl wie - midm Kobb, mid de Fieße, mid dor Hand... - da darfs ehm bloß dor Schiedsrishdor nisch sähn! - odor ooch midm Bauch odor midm Arsch. Ja, bloß Hände sinn vorbodn! Ansonsdn - haubdsache dor Ball dud ins Dohr gehn. Dor Fußballphilesoph sachd - das Runde muss ins Eggische! Im Dohr dud ja abor noch dor Dohrward schdehn, dähr das vorhindorn

soll. Dähr will das Eggische saubor haldn. Das dud mid dor sphährischn Geomedrie zusamhäng - weil Rundes un Eggisches unvoreinbare Geeschnsädze sinn, wie Feuor un Wassor! Im Fußball wird ehm andauornd vorsuchd, dähn dialegdischn Wiedorschbruch von Rund un Eggisch offzuhehm.

Ja, so ham Sie das bishähr noch nisch gesähn - abor so muss mor das sähn! Fußball is eene schdändische andimaderielle Herausfordorung!

Un dor Fußball is außordähm ooch e Schbieschlbild des Lähbens. Mir alle lähm off dor Ährde, abor ehm off vorschiednen Schbielhälfdn! Un niemand weeb vorhähr, was nachhähr is! Weil ehm dor Schbielvorloof immor von soviele Zufälle abhäng dud - wie im eschdn Lähm!

Da brauchdsde bloß een blindn Schiedsrischdor zu ham, un schon kannsde deine ganze Dagdig un Schdradehgie vorgessn. De greeßde Schdärge eenes Fußballors is desweeeschn, wennor weeb, wassor nisch kann! Un das dann ooch mid ganzor Grafd machn dud!

Un e Fußballschbiel is solange nisch gewonn, bisses vorlorn is. Dor Fußballor muss nisch an Gligg un Schiggsahl gloom, ähr muss eenfach Gligg ham un vom Schiggsahl begindischd wern. Währ hindn schdehn dud, dähr had das Besch dor Gligglosn!

Eduard Sachsenmeyer